



TEKS UCAPAN
YBhg. DATUK HAJI ABANG ABDUL WAHAP BIN HAJI ABANG JULAI
DATUK BANDAR KUCHING UTARA
SEMPENA PERHIMPUNAN DBKU EDISI FEBRUARI 2015
4 FEBRUARI 2015
AUDITORIUM DBKU

Bismillahirrahmanirrahim....

Terima kasih saudara Pengerusi Majlis

Yang Berusaha Puan Hajah Kartina Zamhari
Ketua Timbalan Pengarah, Dewan Bandaraya Kuching Utara

Pegawai-Pegawai Kanan DBKU

Serta seluruh warga kerja DBKU yang saya kasihi sekalian....

Assalamualaikum Warahmatullahi Wabarakatuh.....

Salam sejahtera, Salam Satu Malaysia dan Salam 1 DBKU....

Alhamdulillah, syukur yang tidak terhingga dirafakkan kehadiran Illahi kerana dengan izinNya juga maka kita dapat berkumpul bersama-sama di pagi yang ceria ini dan hadir ke perhimpunan bulanan DBKU, Edisi bulan Februari 2015.....

Tuan-tuan dan Puan-Puan,

Pada pagi ini, saya ingin bercakap mengenai Majlis Perasmian Agenda DBKU 2015 yang bakal berlangsung sedikit masa sahaja lagi iaitu pada hari Isnin, 9 Februari 2015 bertempat di Halaman, DBKU.

Untuk makluman warga kerja sekalian, ianya adalah kehadiran julung kali buat Yang Amat Berhormat Ketua Menteri Sarawak serta Yang Amat Berbahagia Datin Patinggi Dato Hajah Jamilah Haji Anu ke majlis rasmi anjuran Dewan Bandaraya Kuching Utara.

Alhamdulillah....seperti yang kita semua sedia maklum, Majlis Agenda DBKU 2015 telahpun diadakan pada 9 hingga 11 Januari 2015 bertempat di Tempat Letak Kereta, Sukma Ria. Tetapi bagi menghormati dan memberi laluan kepada Hari Pengkebumian Tun Datuk Patinggi Haji Abdul Rahman Yaakup, Mantan Yang Di-Pertua Negeri Sarawak, Majlis Perasmian Agenda DBKU 2015 yang sepatutnya berlangsung pada 10 Januari 2015 telah ditunda ke tarikh yang telah saya nyatakan sebentar tadi.

Walaupun pelbagai aktiviti dan program berbentuk hiburan seperti Tayangan Wayang Agenda, Aktiviti Senamrobik, Pentas Rakyat, *DBKU You Got Talent* dan *Fun Ride* telah dibatalkan disaat akhir tetapi saya tetap berbangga kerana ramai warga kota datang berkunjung ke Ekspo Pameran dan juga *Flea Market* sepanjang tempah 3 hari tersebut.

Malahan kehadiran tetamu untuk Program BandarayaKU Berselawat juga adalah diluar dugaan. Walaupun dalam keadaan hujan turun renyai-renyai pada malam berkenaan tetapi ianya tidak melemahkan semangat warga kota dan juga warga kerja DBKU untuk hadir membanjiri pentas utama di perkarangan tempat letak kereta Sukma Ria bagi menyaksikan tausiyah daripada Al-Habib Jindan Bin Novel Bin Salim Jindan yang diterbangkan khas dari Jakarta, Indonesia.

Oleh yang demikian, pada kesempatan ini saya ingin mengucapkan setinggi-tinggi penghargaan dan terima kasih kepada warga kota dan seluruh warga kerja DBKU di atas sokongan padu daripada anda semua atas kejayaan penganjuran Majlis Agenda DBKU 2015.

Tuan-tuan dan Puan-puan,

Adalah diharapkan agar komitmen dan sokongan padu daripada seluruh warga kerja sekalian dapat diberikan sekali lagi semaksima mungkin agar penganjuran Majlis Perasmian DBKU 2015 berlangsung dengan jayanya dan dapat memberikan "*First Impression*" yang terbaik buat kehadiran kali pertama Yang Amat Berhormat Ketua Menteri Sarawak ke Ibu Pejabat, Dewan Bandaraya Kuching Utara.

Kepada warga kerja yang masih belum jelas mengenai pengisian Majlis Agenda DBKU 2015, biarkan saya ceritakan di sini secara sepintas lalu. Untuk makluman, pada tahun ini Majlis Agenda DBKU 2015 akan memfokuskan kepada dua perkara utama iaitu **golongan remaja dan pementapan nilai integriti di kalangan warga kerja DBKU**.

Seperti yang kita semua sedia maklum, amalan budaya kerja berintegriti ini amat penting dan perlu disemai oleh seluruh penjawat awam bagi menghindarkan kita dari melakukan sesuatu yang boleh menjerumus kepada perkara yang di luar kewibawaan ataupun pecah amanah.

Manakala untuk golongan remaja, pelancaran RemajaKU yang bermaksud Remaja Kuching Utara adalah sangat bertepatan sekali. Untuk itu, tahniah saya ucapkan kerana tindakan ini adalah satu usaha yang sangat baik. Sememangnya golongan remaja ini perlu dilibatkan terutamanya semasa aktiviti dan program yang dianjurkan oleh Dewan Bandaraya Kuching Utara.

Tuan-tuan dan Puan-puan,

Golongan remaja amat penting dalam mengukuhkan negara pada suatu masa nanti dan di tangan mereka jugalah terletak tanggungjawab besar dalam menentukan halatuju negara pada masa hadapan.

Tanpa golongan remaja ini, pembangunan negara akan terbantut, kerana di tangan mereka juga terletak satu tanggungjawab yang amat besar bagi memajukan negara.

Tuan-tuan dan Puan-puan,

Walaupun untuk Majlis Agenda DBKU pada tahun ini kita akan memberi fokus kepada Program "**RemajaKU**" tetapi Program "**DBKU Cares**" tetap akan diteruskan dan kita akan tetap memberi bantuan kepada mereka yang memerlukan.

Selain daripada fokus utama yang telah saya nyatakan sebentar tadi, kita juga akan tetap meneruskan usaha untuk memantap dan mempergiatkan lagi usaha untuk merealisasikan Pelan Penambahbaikan CBS (Cantik, Bersih dan Selamat) Bandaraya Kuching 2013-2017 untuk menjadikan Bandaraya Kuching sebagai sebuah bandar raya **TERCANTIK, TERBERSIH dan TERSELAMAT** serta popular di rantau Asia menjelang tahun 2017 selain menjadikan Bandaraya Kuching sebagai sebuah bandar raya yang mempunyai jiwa (*City With A Soul*).

Tuan-tuan dan Puan-puan,

Saya berharap agar apa yang saya telah kongsi sebentar tadi berkenaan dengan Majlis Agenda DBKU 2015 akan mendapat kerjasama dan komitmen yang sepenuhnya daripada seluruh warga kerja DBKU.

Ini adalah kerana untuk merentas semua halangan dan cabaran bagi merealisasikan apa yang dihasratkan dalam Majlis Agenda DBKU 2015 adalah bukan tugas dan tanggungjawab yang mudah, di harap seluruh warga kerja Dewan Bandaraya Kuching Utara dapat memberikan perkhidmatan yang terbaik kepada warga kotanya.

Warga kerja perlu sedar bahawa kejayaan akan hanya dapat dicapai apabila kita mempunyai perancangan yang rapi, pelaksanaan dan kawalan yang berkesan, mempunyai sikap kebertanggungjawaban yang tinggi, kreatif dan berinovasi, bekerjasama dan berkongsi sumber dalam situasi menang-menang (*win-win situation*). Dalam masa yang sama, saya menyeru kepada warga kerja Dewan Bandaraya Kuching Utara agar tidak melakukan sebarang kesilapan, mengurangkan segala bentuk pembaziran dan seterusnya mencari jalan bagaimana kita boleh berprestasi secara "*with less, we deliver more*".

Tuan-tuan dan Puan-puan,

Sebelum mengundur diri, kepada warga kerja DBKU sekalian, teruskanlah khidmat bakti anda kepada DBKU. Berikanlah perkhidmatan dan komitmen yang terbaik kepada organisasi dan juga warga Bandaraya Kuching. Anda semua perlu berganding bahu dan terus berusaha bagi mengekalkan apa yang telah ada sekarang. Saya percaya warga kerja DBKU telah dan akan sentiasa melakukan yang terbaik demi kepentingan mendatang. Ini adalah sangat penting agar kita terus melakar kejayaan demi kejayaan pada tahun ini.

Tuan-tuan dan Puan-puan,

Akhir kata, saya ingin mengambil kesempatan ini untuk menjemput seluruh warga kerja DBKU untuk hadir bersama-sama bagi memeriahkan lagi Majlis Perasmian Agenda DBKU 2015 pada 9 Februari 2015 nanti .

Sekian....

Wassalam....